



Kommune Qeqertalik

Kommunalbestyrelsip suleriaasissaa naliginnaasoq

Kommunalbestyrelsip ataatsimiittarneri

§ 1. Kommunalbestyrelsip ataatsimiinneri tamanut ammasuupput. Taamaattoq Kommunalbestyrelsip suliassat ataasiakkaat matoqqasumik oqaluuserineqarnissaat akuersissutigisinnaavaa, tak. Kommunit aqunneqarnerat pillugu Inatsisartut inatsisaat nr. 29, 17. November 2017-meersoq § 9 (Aqutsinissamut inatsit).

Imm. 2. Suliassat kinguliiniittut matoqqasumik oqaluuserineqassapput:

1. Suliassat aalajangiivigineqarnissaminni inunnut tunngassuteqartunik naliliisariaqarfiusut
2. Suliassat illuutinik aalaakkaasunik pisinissamik tunisinissamilluunniit ilaqartut, aamma
3. Illuni suliassat pisiassallu pillugit missingiutit neqeroorutillu.

Imm. 3. Taamaattoq suliassap matoqqasumik oqaluuserineqarnissaanut tunngavissaqarnerasoq pillugu apeqqut matoqqasumik oqaluuserineqassaaq tamanna Kommunalbestyrelsimit imaluunniit Borgmesterimit aalajangerneqarpat, tak. aqutsinissamut inatsit § 9.

Imm. 4. Suliassat matoqqasumik oqaluuserineqartussat sapinngisamik kingulliullugit oqaluuserineqassapput.

Imm. 5. Kialluunniit Kommunalbestyrelsip ataatsimiinneri ammasut najuuffigisinnaavai eqqissimasumik torersumillu pissuseqarnissamik piunasaqaateqarneq sianigalugu. Tusarnaartup oqaluuserinninnerit akornusersorpagit Borgmesterip pineqartoq imaluunniit pisariaqartinneqarpat tusarnaartut tamaasa ataatsimiinnermit qimagutsissinnaavai. Borgmesterip immikkut inissat tusagasiorfiit sinniisuisa atugassaat inniminnersinnaavai.

Imm. 6. Kommunalbestyrelsip ataatsimiinneri ammasut TV-mut imaluunniit radiumut immiunneqarnissaat akuerisinnaavaa.

Kommunalbestyrelsimut ilaasortat ataatsimeeqataasinnaajunnaartarnerat

§ 2. Ilaasortaq Kommunalbestyrelsip ataatsimiinnissaani ataatsimeeqataasinnaajunnaaruni tamatumingga Siulittaasoq ataatsimiinnissaq sapinngisamik ullunik tallimanik sioqqullugu nalunaarfigissavaa. Ataatsiminnerni ataasiakkaani ataatsimiinnerup imaqarniliornerani allanneqartassaaq ilaasortaq kina ataatsimeeqataasimannginnersoq.

Oqaluuserisassat nassiussorneqarnerat suliassallu saqqumitineqarnerat

§ 3. Ileqquusumik ataatsimiinnissaq kingusinnerpaamik ullunik 21-nik sioqqullugu allakkatigut suliassaq oqaluuserineqassasoq qinnutigineqarsimappat taanna siullermik ataatsimiinnissami oqaluuserisassanut Borgmesterimit ilanngunneqassaaq. Borgmesterili suliassamut naliliippat piffissaq sivisunerusoq pisariaqartinneqartoq kinguartitsisinnaavoq, tamannalu ataatsimiinnermi siullermi ilisimatitsissutitut ilanngunneqartassaaq. Suliassamik nassiussinnermi Borgmesterip allattoqarfia, akissuteqartassaaq, suliassap tingusimaneranik, kiisalu ataatsimiititalianut ingerlateqqinneqarneranik.

Imm. 2. Ileqquusumik ataatsimiinnissaq kingusinnerpaamik ulluinnarnik tallimanik sioqqullugu oqaluuserisassanut takussutissiap Kommunalbestyrelsimi ilaasortanut tamanut nassiunneqarnissaa Borgmesterip isumagissavaa.

Imm. 3. Suliassaq ileqquusumik ataatsimiinnissami oqaluuserisassanut ilanngunneqaraangat suliassap nalilerneqarnissaanut atugassat pisariaqartinneqartut - ilaasortanut nassiunneqareersimangikkunik - kommunip allaffianiit innuttaasunit tiguneqarsinnaassapput sivikinnerpaamik ulluinnarni sisamani ataatsimiinnissaq sioqqullugu. Tamatumunnga peqatigitillugu oqaluuserisassanut takussutissiaq saqqumitineqassaaq.

Imm. 4. Immikkut ittumik ataatsimiinnissamut ataatsimiigiaqqusinnermi Borgmesterip sapinngisamik suliassat suut ataatsimiinnissami oqaluuserineqarumaarnersut sukumiisumik ilaasortanut ilisimatitsissutigissavai.

Aalajangiisinnaassuseq, ataatsimiinnerup aqunneqarnera suliassallu saqqummiunneqarnerat

§ 4. Kommunalbestyrelsi ikinnerpaamik ilaasortat affaat peqataagunik aalajangiisinnaassuseqarpoq, tak. aqutsinissamik inatsit § 11, stk. 1.

Imm. 2. Kommunalbestyrelsip ataatsimiinneri Borgmesterimit, taannalu pisinnaangippat tullersortaanit siullermit (appaanit) aqunneqassapput. Borgmesterip oqaluuserinnerup aqunneqarnera ataatsimiinnerullu nalaani torersumik pissuseqarnissaq pillugu apeqqutit tamaasa aalajangiiffigissavai. Aammattaaq immikkoortut taasiffiusussat Borgmesterip aaqqissuuttassavai.

Imm. 3. Kinaluunniit oqaaseqarumasoq Borgmesterimut saaffiginnissaaq, taassumalu ilaasortat piumasaqaateqarsimasut tulleriinneri malillugit oqaaseqartittassavai. Ilaasortat arlallit oqaaseqarumallutik ataatsikkut piumasaqaateqarpata Borgmesterip oqaaseqartussat tulleriinnilissavai. Oqaaseqartut Borgmesteriunngitsumik kipitineqassanngillat.

Imm. 4. Ilaasortap kialluunniit torersumik pissuseqarnissap malinneqarnissaa pillugu Borgmesterip aalajangiinera malissavaa. Ilaasortaq ataatsimiinnermi ataatsimi marloriarluni torersumik pissuseqarnissamik peqquneqarsimappat Borgmesterip siunnersuuteqarneratigut ataatsimiinnermi tassani oqaaseqaqqissanngitsoq Kommunalbestyrelsip aalajangersinnaavaa.

Imm. 5. Borgmesterip apeqqutit nammineq aalajangiiffigisinnaasani Kommunalbestyrelsimut aalajangiiffigissanngortissinnaavai.

Ataatsimiinnermik siulersuineq

§ 5. Suliassat ataatsimiinnermi oqaluuserineqassapput Borgmesterip tulleriinnilersuinera malillugu, taamaalillunilu oqaluuserisassanut takussutissiami tulleriinnilersuineq saneqqussinnaallugu.

Imm. 2. Ilaasortaq kinaluunniit ataatsimiinnerup aallartinnerani oqaluuserisassanut takussutissiaq pillugu, tassunga ilanngullugu oqaluuserisassat tulleriiaarneqarnerat pillugu apeqqutitut oqaaseqarnissaminik aammalu oqaluuserisassat matoqqasumi oqaluuserisassanut nuunneqarnissaannik akerlianilluunniit piumasaaqateqarsinnaavoq.

Suliassat saqqummiunneqarnerat

§ 6. Inatsisitigut allamik aalajangiisoqarsimangippat imaluunniit marloriarluni oqaluuserinninnissaq Kommunalbestyrelsimit aalajangiunneqarsimangippat suliassaq ataasiaannarluni oqaluuserineqassaaq. Kommunip aqutsinissamik ileqqoreqqusaa aqutsinissamik inatsisip § 1, stk 2 naapertorlugu marloriarluni oqaluuserineqassaaq, aammattaaq ukiumoortumik missingersuusat marloriarlutik oqaluuserineqassapput, tak. Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. 26, 28. November 2016-meersoq § 21.

Imm. 2. Siullermeerlugu oqaluuserinninnermi suliassap aalajangiivigineqarnissaa taasissutigineqassanngilaq, taamaallaat aappasaaneerlugu oqaluuserisassanngortinneqarnera. Suliassap aappasaaneerluni oqaluuserisassanngortinneqannginnerani ilaasortaq kinaluunniit suliassaq pineqartoq pillugu oqaaseqarumasinnaavoq suliap aappasaaneerneqarnissaanut Kommunalbestyrelsimit aalajangiiffigineqannginnerani. Siullermeerlugu aappasaaneerlugulu oqaluuserineqarnera ullormi ataatsimi pissanngilaq. Taamaattoq aqutsinissamut ileqqoreqqusap aamma ukiumoortumik missingersuusat siullermeerlugu aappasaaneerlugulu oqaluuserineqarnerat pissaaq aqutsinissamut inatsisip § 1, stk 2 aamma aningaasaqarnermut aqutsinissamut inatsisip § 21 malillugit ullunik 14-inik akunneqartillugit.

Imm. 3. Suliassaq marloriarlugu oqaluuserineqassatillugu siullermeerlugu oqaluuserineqarnerani pappiaqqat atorneqartut sapinngisamik ilaasortanut saqqummiunneqassapput imaluunniit taakku akornanni kaaviiartinneqassallutik.

Aalajangiinissamut tunngavissaq

§ 7. Kommunalbestyrelsi aalajangersinnaavoq suliassaq ataatsimiititaliap aalajangersimasup susassaqrarfiinut ilaanngitsoq ataatsimiititaliat ataavaartut ilaanni oqaluuserisassanngortinneqassasoq.

Imm. 2. Kommunalbestyrelsi isumaqarpat suliassaq Kommunalbestyrelsimi oqaluuserineqannginnermini immikkut ataatsimiititaliami oqaluuserineqartariaqartoq ataatsimiititaliaq taamaattoq pilersinneqassaaq Kommunalbestyrelsip suliassami tassani aalajangiinera malillugu amerlassuseqartumik ilaasortaqartoq.

Imm. 3. Immikkut ataatsimiititaliaq nammineq siulittaasussamik qinersisussaq allaganngorlugu nassuiaasiussaaq Borgmesterimut ingerlatinneqartussamik, taassumalu taanna Kommunalbestyrelsimut ilaasortaanut agguaatissavaa.

Oqaluuserinninnerni taasinernilu ilaasortat peqataanissaat

§ 8. Ilaasortat ilaat suliassami aalajangersimasumi inuttut ima soqutigisaqartiginersoq, suliassamillu taassuminnga Kommunalbestyrelsip oqaluuserinninnerani taasinernilu peqataanngitsoortari-aqarnersoq, Kommunalbestyrelsip aalajangiiffigissavaa. Taamatut pisoqartillugu suliassap saqqum-miunneqarnerani, oqaluuserineqarnerani taasissutigineqarneranilu pineqartup ini ataatsimiiffik qimassavaa.

Imm. 2. Ilaasortap pissutsinik suliassanilu aalajangersimasuni inuttut soqutigisaqarnini pissutigalugu ataatsimiissutiginninnerni taasinernilu peqataasinnaanerminut nalornisoornartoqartillugu Kommunalbestyrelsi ilisimatisavaa.

Ilaasortat oqaluuserinnermi taasinermilu peqataasarnerat

§ 9. Ilaasortat Kommunalbestyrelsip isumaqatiginninniarnerni taasinernilu taamaallaat peqataa-sinnaapput taakkunani nammineerlutik najuunermikkut.

Imm. 2. Kommunalbestyrelsi aalajangersinnaavoq, ilaasortat ilaat naapilluni ataatsimiinermut ilaasussatut oqarasuaatikkuq attaveqaatilluunniit allat atornerisigut peqataasinnaasut, soorlu aamma kommunalbestyrelsi aalajangersinnaasoq ataatsimiinneq taamaallaat oqarasuaatikuinnaq imaluunniit attaveqaatit allat atornerisiguinnaq soorlu skype atorlugu ingerlanneqassasoq.

Imm. 3. Kommunalbestyrelsimut ilaasortaq teknologi atorlugu attaveqaatikkut kommunalbestyrelsip isumaqatigiinniarnerni taasinernilu peqataasinnaatitaavoq, aqutsineq pillugu inatsimmi tamatu-munga malittarisassat naapertorlugit, aqutsineq pillugu inatsimmi §11, imm. 2 naapertorlugu.

Taasinerit, allannguutissanut aamma ilaannakortumik allannguutissanut siunnersuutit

§ 10. Taasinerit ingerlanneqassapput ilaasortat nappaanerisigut imaluunniit tamanut nalunaa-rutiginerisigut.

Imm. 2. Inatsisitigut allanik maleruagassaqaqngikkaangat aalajangiinerit tamarmik amerlanerus-suteqarnikkut aalajangiivigineqartassapput.

Imm. 3. Borgmesteri isumaqaruni suliassap qanoq inaarneqarnissaa ima nalorninaatsigisoq taasissutigineqarnissaa pisariaqarani tamanna oqaatigissavaa suliassap qanoq inaarneqarneratut isummani oqaatigiutigalugu. Taassuma kingorna ilaasortat arlaannaalluunnit taasinissamik piumasaqaateqaqngippat Borgmesterip oqaatigisinnaavaa suliassaq naammassineqartoq inaar-neqarneratut isummani naapertorlugu.

Imm. 4. Taasineq allattuilluni taasiffilerluni ingerlanneqassaaq, tamannalu Borgmesterip isumagineqassaaq tunniunneqarlunilu ilaasortaq ataaseq amerlanerilluunniit piumasaqaateqarpata.

Allannguutissatut aamma allannguutaaqqittussatut siunnersuutit

§ 11. Allannguutissatut aamma ilaannakortumik allannguutissatut siunnersuutit saqqummiunneqarsinnaapput taasinissaq pitinnagu, siunnersuutillu taamaattut suliassat marloriarlugit oqaluuserineqartussat siullermeerlugit oqaluuserineqarneranni saqqummiunneqartariaqaratilluunniit ilimasaarutigisariaqanngillat, taamaattoq tak. imm. 2.

Imm. 2. Suliassat marloriarlutik oqaluuserineqartussat eqqarsaatigalugit Kommunalbestyrelsi aalajangersinnaavoq allannguutissatut aamma pissutsit tunngavigalugit ilaannakortumik allannguutissatut siunnersuutitik saqqummiussinissamut piffissaliisoqassasoq, taamatut pisoqartillugu piffissaritaasup qaangiutereerneratigut saqqummiussisoqarsinnaanngilaq.

Imm. 3. Allannguutissatut aamma ilaannakortumik allannguutissatut siunnersuutit aappasaaneerlugu oqaluuserinninnissaq sioqqullugu ilaasortanut ilisimatitsissutigineqarsimangippata oqaluuserinninnerit aallartinneranni Borgmesteri siunnersuutit pillugit nalunaaruteqassaaq, taakku saqqummiunneqarsimappata. Borgmesterip aalajangissavaa allannguutissatut siunnersuutit qanoq tullerinneqarlutik taasissutigineqassanersut, taakku taasissutigineqartassapput siunnersuutigineqaaqqaartoq taasissutigineqartinnagu.

Imm. 4. Ataatsimiititaliamik pilersitsinissamik, ataatsimiititaliamut siusinnerusukkut pilersinneqareersimasumut suliassap innersuunneqarnissaanik imaluunniit ataatsimiititaliami nangillugu suliarineqarnissaanik siunnersuutit saqqummiunneqarsinnaapput suliassap taasissutigineqarnissaa pitinnagu. Suliassap oqaluuserineqarnera aallartinneqareersoq siunnersuutit taamaattut saqqummiunneqarpata suliassap oqaluuserineqarnera unitsinneqassaaq, Kommunalbestyrelsip aalajangiiffigissavaa suliassaq ataatsimiititaliami oqaluuserineqassanersoq.

Amerlanerussuteqarnikkut qinersinerit

§ 12. Siulittaasumik, inunnillu ataasiakkaanik allanik qinersinerit, taakkununga ilanngullugit kommunimi sulisussanik atorfinitsitsinerit, ingerlanneqassapput amerlanerussuteqarnikkut qinersinertut.

Imm. 2. Amerlanerussuteqarluni qinersinikkut qinigaassaaq qinigassaq taasinerit affaanit amerlanerusunit (taasinernik amerlanerpaanik) taaneqartoq. Qinigassaq taasinerit affaanit amerlanerusunit taaneqanngippat qinigassat marluk amerlanerpaanik taaneqarsimasut akornanni aalajangersimasumik qinersisoqassaaq, aalajangersimasumik qinersisoqarnerani taasinerit amerlaqatigiippata amerlanerpaanik taaneqartut akornanni marluk qinigassanngortinneqassasut makitsinikkut aalajangerneqassaaq. Tassani taasinerit amerlaqatigiippata makitsinikkut aalajangiineqassaaq.

Qanoq amerlassuseqarneq tunngavigalugu qinersinerit

§ 13. Kommunalbestyrelsimi, kommissionini siulersuisuni taamaaqataannilu ilaasortassanik marlunnik amerlanernilluunniit Kommunalbestyrelsip qinersineri ingerlanneqassapput qanoq amerlassuseqarneq tunngavigalugu qinersinertigut.

Imm. 2. Qanoq amerlassuseqarneq tungavigalugu qinersinerit ingerlanneqassapput imatut: Kommunalbestyrelsimi ilaasortat immikkoortunut agguaatissapput qinersinissami pineqartumi qanoq taasiumanerlutik Borgmesterimut nalunaaruteqarsimanertik malillugu. Immikkoortut ataasiakkaat ilaasortaat agguarneqassapput 1-imik, 2-mik 3-mik il.il. Taakku malillugit amerlassuseq malillugu tulleriinnilerlutik immikkoortut sinniisuutitaasatik qinertassavaat. Amerlassutsit marluk amerlanerilluunniit amerlaqatigiippata qanoq tulleriinneqarnissaq makitsinikkut aalajangerneqassaaq. Immikkoortut ataasiakkaat sinniisuutitaasatik naammatsillugit aalajangiiffigereerunikkut piaartumik Borgmesterimut nalunaarutigissavaat kikkut toqqarneqarsimanersut. Immikkoortup sinniisuutitaasani ataaseq arlalilluunniit toqqanngitsoorsinnaavai. Taamatut pisoqartillugu inissat inuttalerneqanngitsut immikkoortut allat akornanni siuliani taaneqartutut inuttalerneqassapput.

Aalajangiinermut imaqarniliaq

§ 14. Kommunalbestyrelsip ataatsimiinnerini aalajangiinerit allanneqassapput Kommunalbestyrelsip allattaanit aalajangiinernut imaqarniliami. Borgmesterip oqaatigissavai suut allanneqassanersut.

Imm. 2. Ilaasortaq kinaluunniit piumasaqarsinnaavoq isummani allaasoq naatsumik imaqarniliami allanneqaqqullugu, tak. aqutsinissamut inatsisip § 16-ia.

Imm. 3. Aalajangiinernut imaqarniliaq ataatsimiinnerit naammassinerini, allanneqarsimasut atuarneqareeraangata, ilaasortanit ataatsimeeqataasimasunit tamanit atsiorneqassaaq. Ilaasortat taasisimanertik imaluunniit pissutsit allat innersuutigalugit aalajangiinernut imaqarniliaq atsioriumanngissinnaanngilaat.

Imm. 5. Imaqarniliap atsiorneqarneraniit kingusinnerpaamik qaammat ataaseq qaangiuppat ammasumik matoqqasumillu ataatsimiinnermi imaqarniliap nuutinnera Naalakkersuisunut Nakkutilliisoqarfimmullu Borgmesterimit nassiunneqassaaq.

Borgmesterip aqutsinissaminut pisinnaatitaaffii

§ 15. Ilaasortaq kinaluunniit suleriaasissami aalajangersakkat qanoq paasineqarnissaannik Borgmesterip aalajangiinera malissallugu pisussaatitaavoq, apeqqutilli Kommunalbestyrelsip tullianik ataatsimiinnissaani saqqummiunneqarsinnaatitaapput.

Suleriaasissami allannguutit

§ 16. Suleriaasissaq manna atortuulersinneqarpoq ulloq 27-03-2018

Taamaalilluni akuersissutigineqarpoq Kommunalbestyrelsip ataatsimiinnerani ulloq 27-03-2018



Ane Hansen
Borgmesteri